

Nua è Asghar Akbarzadeh?

Minoritads emblidadas en l'Iran

DA GUIU SOBIELA-CAANITZ

■ **1935 ha la Persia surpiglià il num d'Iran, pia «pajais dals Indogermans». Ses cunfins èn restads bunamain stabels dapi 1828, cur che ses retg ha stui ceder a la Russia l'intschess che furma oz la republica da l'Aserbaigian. Ma l'Iran, oz «republica islamica» (67 milliuns olmas), ha anc dus districts numnads Aserbaigian, quel dal vest u «garbi» (strusch 3 milliuns, chapitala Urmia) e quel da l'ost u «scharchi» (3,5 milliuns, chapitala Tabris).** Areguard l'islam da la «schia» ed il linguatg tirc, tuttafatg different dals indogermans, datti mo in pievel aseri che viva er en il district limitrof d'Ardabil (strusch 1,25 milliuns) sper il Mar caspic, e furma 24% da la populaziun iranaisa, pia la principala minoritad etnica dal pajais, schebain ch'igl'è scumandà da duvrar il tirc aseri per instruir a scola. A Boneb sper il Lai d'Urmia han ins bajegià in reatur per la perscrutaziun nucleara. Ils Aserids èn represchentads vaira bain aifer l'elita iranaisa; il «rahbar» Ajatollah al Udma (Sajed Ali) Khamenei, chau da la republica e guid spiritual dal pajais, è da derivanza aseri. I na smirveglia tuttna betg che gist lez pievel, en contact cun dus stadis seculars limitrofs, da linguatg uffizial tirc, n'accepta betg il clericalissem e la monolinguitad persiana da Teheran. L'Iran

dumbra pliras outras minoritads geograficain periferas. En il district da Sistan-Balutschistan (2,2 milliuns olmas), sper il cunfin cun il Pachistan, planschan daditg ils Balutschs, muslims ortodoxs, che la majoritad, aderenta da la «schia», als discrimineschia areguard la religiuin. Sper ils cunfins cun l'Irac e la Turchia vivan Curds: «En lur intschess han ins tramess schuldada iranaisa, schizunt 100 000 umens tenor funtaunas curdas, amez fanadur 2005, per supprimer ina revolta erutta suenter il mazzament d'in activist curd a Mahabad. Forzas da segirtad en la citad da Sachis duain avair mazzà almain dudesch demonstrators curds e ferì passa settanta» (1).

«Amnesty International» appellescha

Dapi la primavera 2006 èsi dentant pli critic en l'intschess aseri. «The Economist» dals 3 da zercladur (p. 40) rapporta ch'ina gasetta da la regenza haja publictà ils 12 da matg «ina caricatura che mussava a discurrend tirc aseri ina chamulauna (bau) da cuschina (...). Plis dis da protesta tar ils Aserids da l'Iran èn culminads, ils 25 da matg, cur ch'ins ha mazzà quatter demonstrators en la citad parzialmain aserida da Naghadeh.» La cifra da quatter morts è l'uffiziala, ma in messadi dals 21 da november, derasà dad «Amnesty International» («AI») (2), precisascha areguard lezzas de-

monstraziuns da matg: «Tenor funtaunas aseridas duain las forzas da segirtad avair mazzà tozzels umans e ferì plis tschients». Lezza giada, ils 25 da matg, «han ins arrestà Asghar Akbarzadeh, student d'Ardebil. Suenter diesch dis da fermanza l'han ins mess en libertad. Il di da la manifestaziun d'Ardebil [27 da matg] han agents dal ministeri da spiunagi ('Ministry of Intelligence') perquirì tar sia famiglia.» «AI» rapporta plinavant che civilists, forsa funcziunaris da lez ministeri, hajan «arrestà Akbarzadeh ils 31 d'october avant ils bajetgs universitars e che sia famiglia na sappia pli nagut d'el dapi lez di. Sia mamma duai avair dumandà pliras giadas suenter el ad Ardebil, tar la dretgira ed il post dal ministeri da spiunagi, ma las autoritads (...) n'han gnanca confermà ch'el saja en fermanza.» Ins tema ch'el saja en ina praschun secreta nua ch'ins pudess al torturar. «AI» supplitgescha perquai da palesar a las autoritads iranianas ch'ins haja quità da sia sort. Ins sa per exempel sa drizzar a l'ambassada da l'Iran (3).

- 1) Der Fischer Weltalmanach 2007, Frankfurt/Main (Fischer Taschenbuch Verlag, ISBN-13 978-3-596-72007-1) 2006, p. 245.
- 2) Funtauna: http://www.amnestyinternational.be/doc/article.php?id_article=9416
- 3) Adressa: Ambassade de la République islamique d'Iran, Thunstr. 68, 3006 Berna. Fax 031 351 56 52.